



QUÆSTIO MEDICA

CARDINALITIUS DISPUTATIONIBUS

MANE DISCUTIENDA

IN SCHOLIS MEDICORUM.

Die Jovis 27. Februarij.

M. NICOLAO RAINSSANT,

DOCTORE MEDICO, PRÆSIDE.

Est-ne optima vivendi lex sua unicuique consuetudo?

I.

QUANTI vita ab omnibus æstimatur, tanti sanitas à medico, cui una eademque est optima vivendi, quæ valendi ratio. Altera functionum integritate stat, & sustinetur; altera calidi nativi conservatione viget, & retinetur; utrique pariter prospicit communis quædam rerum nonnaturalium lex, certo quodam earum delectu, & utendi modo, nemini non necessaria, nemini ferè non diversa; utpotè quæ consuetudinis vi sæpius ducitur, quàm naturæ instituto. Quid tamen in ore medicorum frequentius versatur naturæ majestate, ne dicam voluntate? Igneus est illi vigor; amat saluberrimò aëris flabello ventilari; cibi potusque pabulo refici suavissimo & facillimo; somni agendique torpore metuit extinguì; aut vigiliarum exercitationumque immoderatione dissipari; tot in dies excrementorum veluti cineres fuliginève cumulantur, quot nec diutius retineri cupit, nec uberius excerni. Prætereaque mutuo tum corporis, tum animi motu ad bonum malumve commoveri dicitur ista hominum natura, à singulis nunquam satis dicta, in singulis nunquam satis explorata. Principium est motus & quietis in unoquoque ad munera sibi convenientia exequendum. Verum quis ejus latitudinem & vires alià quàm consuetudinis mensurà assequetur apud populos tam moribus quàm facie dissimiles, tam vitæ quàm locorum discrimine inter se dis-

2

junctos? Quibus nemo quantumvis prudentissimus æquissimam ætē, cibi potusve, vigiliarum & somni, motus & quietis, excreti & retenti, animique pathematum usuram rectē accommodabit, nisi ex genere vitæ diū multūque recepto; ut inde una consuetudo ad hominum valetudinem plurimū valeat quasi natura non dicam altera, sed sensim sine sensu harum vel illarum rerum assiduitate alterata.

I I.

DUPLEX est homini temperamentum. Aliud proprium, quod singulis partibus ex sanguine materno benē conformatis inest, veluti quædam mixtionis soboles; aliud commune dicitur, quod ē corde ad eas omnes, tanquam ē sole lux quoquoersum diffunditur per vitales spirituum radios. Utroque constat natura, seu vis agendi patiendique in quolibet corpore varia, & variis in quolibet homine mutationibus obnoxia, quæ à nascendi principio per alios vitæ & sanitatis gradus subsequuntur. Hinc enim triplex ætatis species sibi invicem succedit, mihi que sufficit, quemadmodum & meo & omnium medicorum præceptori, ad omnia vivendi tempora sigillatim certiusque distinguenda. Hinc etiā ægotandi occasio se præbet, violatā corporis constitutione, aut accensā febre per calidi nativi, quæ naturæ potior pars est, in peregrinum conversionem. Quid plura? Hinc ipsa oritur moriendi necessitas, cum partes temperamento nimis mutatæ ab injuriis rerum quæ nos afficiunt, ad extinctionem usque pugnant cum calido nativo, quod nec cum humore primigenio, nec secum unquam pugnare potuit. Profecto nonnulla vivendi mediocritas proponitur nascenti, aut primū concepto homini, incerta quidem, neque ulli unquam satis manifesta reliquo ætatum decursu. Igitur quantum ab ejus scopo deflectunt aër, alimenta, & quæ utriusque commoda sequuntur sordes, aut functiones corporis: tantum necesse est partium temperiem utramque, & dispositionem immutari, & naturam à seipsa veluti revocari ad eam agendi formam, quam tot rerum familiaritas dederit, sinxeritque consuetudo naturæ partim imitatrix, partim magistra: cujus subitam mutationem plurima sanitatis injuria consequatur, tantaque sit habenda ratio, ut similibus ope non minus conservari debeat, quam vita.

I I I.

QUÆDAM affinitatis consensio ac dissensio experientiæ intercedit cum consuetudine, acquisitā istā nec incertā, aut desultoriā naturæ ad agendum patiendumve facilitate, in quovis hominis instrumento, seu animali facultati serviat, seu naturali, quæ vitalem capit. Consuetudo enim à singularium rerum eadem frequentique usurpatione, experientia deinde ab earumdem observatione ducitur: hæc illam judicat, non secus acalimenterum venenorumque vires: atque citissimè decernit ex sanitatis constantiā, quænam sit unicuique optima vivendi lex. Nimirum ea quæ ad corporis animique functiones omnem habebit vacuitatem doloris, & facilitatis commoditatem in rerum ad vitam necessarium usu. Hanc autem aliter atque aliter sustinere discunt & experiuntur corporis partes caloris nativi impetio subditæ, quoties familiari assiduoque spirituum præsidio sepius

inuniuntur, & repetito quodam agendi commercio ad suum quæque officium magis inclinantur. Adeo per consuetudinem flexilis est hominis natura in varios animi corporisque modos & motus: ut omnem etiam laborem facilius puer, vel senex, quam infuetus homo toleret; & quæ diu consueta sunt, etsi deteriora sint infuetis, attamen minis molestiæ pariant. Quid igitur demiramur aliquem manibus captum, qui pede scribit, fidibus canit, calculos movet & aleam, fuit? qui deinde nec pravis contabescit alimentis, nec interit venenis? qui servato eodem vivendi tenore certam sibi præstitui sentit horam edendi, dormiendi, ventremque exonerandi, & vesicam, ex consuetâ tot rerum agendarum ratione, quæ dum naturæ motum sequitur, hunc deinde magis ac magis perficit? Pusilli autem ac penè ignari hominis est optimam singulorum vitam suo aut populari modo semper describere atque commendare. Quin potius medicus, velut totius mundi arbiter, non ejus partem aliquam, sed hunc totum animo complectatur: nec apud eum fide rarebit consuetudinis non secus ac naturæ vis: nec judicabitur multa fieri non posse ad vivendum, quæ jam pridem facta sunt inter diversos terrarum populos.

IV.

CONDUCTA infantis alieni nutrix idem matris nomen ab ubere habet, quod propria genitrix ab utero: neque aliter consuetudo hominem à parente naturâ genitū aliter educatque, & maternis officiis suum reddit. nudum quidem excipit, neque deinceps tegit ubique locorum, quasi in aliqua regione plus ei metueret à culice, quam ab ullâ aëris inclementiâ. Vix natum nunc aquâ calente lavat, aut vino, aut utriusque diluto cum butyri oleive portumculâ sine fale aut pulveribus: olim istis utebatur, aut frigidissimo amne, ad sanitatis bellicarumque rerum præstantiam: Nec lavabat modò; verum sævo gelu & undis durabat, non imbelles aut caducum, sed durum plurimæque virtutis ab avitâ stirpe hominum genus. Alij tamen mores & nascienti parcere visi sunt, & ejus aliquandò pudori præparare ab amiculo auxilium. Alij multiplex ei injecerunt ex pluribus pannis involutum, quod alibi per singulos artus fasciis strictius comprimunt; alibi per crura liberius solvunt. In hoc autem tam diverso vitæ jucundæ apparatu, primum vagitus infantis, ac deinde ploratus consuetudinis acquirendæ difficultatem denotare potest, acquisitæ non potest laudem minuire. Nam lactis à naturâ propositi novitas, nonnè etiâ vomiturienti ventriculo, aut torminosis intestinis diu multumque molestiæ abstergit; quam unus denique abstergeat lactandi usus, non certâ quâdam horâ repetendus, sed eâ potissimum quam nutricum vigilantia ploranti optimam fecerit, aut non dormienti. Quasi verò cunarum ardor inter proprium stercus & urinam, sapientis infantem non excitaret ad alimentis solatium, quam naturæ vox, aut inopia. Quamobrem in hac lactandi frequentia eadem esse putem à nutribus posita, & rudimenta consuetudinis, & incunabula edacitatis, quæ in græcis olim gula fuit, in gallis semper natura.

V.

QUI deinde unam vestis tectique speciem singulis cujusvis ætatis genibus præscriberet, is non minis ab omnibus derideretur, quam qui

unum idemque cibi, potus, exercitationisque genus; nunquam ruri, semper in urbe. Aut si cuicumque homini sano & bene valenti tam varia esse debet vivendi lex, quidni & variis tot regionum incolis, qui pane radicibus cocto æquè vigent, ac quilibet magnatum suis deliciis? Qui subdio tam in utramque aurem dormiunt, quàm viri principes sub aurato fornice. Qui deindè aut carnibus parùm coctis vescuntur, aut crudis plantarum fructibus, caulibus, foliis, radicibus, nutritibus quidem, communi judicio, & inopis & feræ sortis. Vixerunt tamen sanique vixerunt Cauchorum populi, quibus nec arbores nec pecudes erant; quibus lutum non sole sed ventis; cibi non igne sed terrâ siccabantur. Vixerunt Arimphæi quibus sedes nemora, alimenta baccæ, ritus etiam clementes. Hodieque vivunt tot barbaræ alterius orbis nationes, tantùm à nostra vivendi normâ alienæ, quantum ad istorum vitam propius accesserunt. Verùm ad certam consuetudinis gloriam, vivimus & nos, qui cibi potusque qualitate, præparatione, copiâ, sumendi tempore, ordine, à vicinis gentibus æquè discrepamus, ac exercitationum, animique commotionum, aut aëris varietate. Præterquàm quod à nobismet ipsis tantoperè dissidemus, ut in eadem regione alter pisce, aut legumine; alter carne valeat; alter vino quocumque, alter aquâ; alter pane cibario, alter siligineo. Alius impune cænat etiâ liberaliùs; alius prandio magis delectatur. Hic ad stagna, paludes, fluvios, mare salubriter degit; ille ad montes, sylvas, aut in apertâ camporum planitie. Plurimi diurno labore recreantur; nonnulli nocturno. Est qui concubitum fugit; est qui non pertimescit. Dormiturus quidam plumâ gaudet, quidam paleâ, vel etiam asseribus; milites, pastores, agricolas, operarios, bajulos vel in nuda humo suaviter meridiari, aut etiam pernoctare ipsa sanitas lubenter patitur audirâ consuetudine, quæ qualiscumque fuerit comparata, hominum vitam nec breviorē facit, aut tristiorē; nec animum ad artes ineptiorē, si ulla ei favet præitque institutio.

Est igitur optima vivendi lex sua unicuique consuetudo.

Afferebat Luteriæ JOSEPHUS THOMASSEAU,
Andinus. A. R. S. H. 1676.

PARISIIS,

Apud FRANCISCUM MUGUET, Regis & Illustrissimi
Archiepiscopi Parisiensis Typographum.